

CONVENIO DE COLABORACIÓN ENTRE A AXENCIA DE TURISMO DE GALICIA E O CONCELLO DE VIVEIRO PARA ACTIVIDADES DE PROMOCIÓN E DINAMIZACIÓN DO TURISMO DEPORTIVO EN VIVEIRO

O xerente de Turismo de Galicia

DECLARA:

Que esta Axencia Turismo de Galicia formalizou co Concello de Viveiro o instrumento convencional arriba referido por un período de vixencia que abrangue dende a data da súa sinatura ata o 31 de decembro de 2026.

Que o instrumento convencional ten por obxecto establecer o marco de colaboración para a promoción do turismo deportivo a través do apoio a probas deportivas que se van desenvolver no Concello de Viveiro de acordo co establecido no orzamento do convenio.

Como obxectivos de colaboración inclúese o de impulsar o desenvolvemento cultural e económico de Viveiro a través do impacto das actuacións para atraer a visitantes, xerar turismo cultural e, ao mesmo tempo, contribuír ao crecemento económico da vila e da provincia.

Que existe converxencia de intereses entre as entidades asinantes en orde á consecución obxecto referido.

Que o instrumento convencional que se pretende asinar se **fundamenta** no seguinte:

Primeiro.- A Axencia Turismo de Galicia, en virtude do disposto no artigo 9 dos seus estatutos, aprobados polo Decreto 196/2012, do 27 de setembro, é a entidade pública instrumental do sector público autonómico de Galicia á que lle corresponde o impulso e execución da política turística da Xunta de Galicia en relación coa promoción da calidade e a innovación, o desenvolvemento, mellora, información e difusión do sector turístico galego, potenciando a devandita oferta, mediante a comercialización, información e difusión do produto turístico da Comunidade Autónoma de Galicia.



Para lograr esta finalidade a Axencia Turismo de Galicia acomete, no ámbito das súas competencias, un decidido apoio á promoción e fomento do sector turístico de Galicia a través daquelas accións que lle permiten acadar os seus obxectivos.

Segundo.- A riqueza patrimonial e paisaxística de Viveiro vese complementada coa súa grande variedade de festas e eventos que ao longo do ano dinamizan a poboación como destino turístico, mellorando a experiencia dos visitantes e veciños e determinado a identidade da cidade.

Para o Concello de Viveiro a promoción, difusión e posta en valor dos seus recursos turísticos patrimoniais e de natureza, as súas festas e eventos ao longo de todo o ano permiten desestacionalizar e facer de Viveiro un destino cunha ampla oferta cultural, musical e de ocio para veciños e visitantes.

Con estas actuacións, o concello pretende impulsar Viveiro como vila da cultura e referente nacional e como un destino turístico imperdible.

A Estratexia de Turismo de Galicia 2030 ten como misión a sostibilidade integral e dentro dela se recolle a medida estratéxica do desenvolvemento turístico responsable.

A poboación local xoga un papel esencial no desenvolvemento turístico dado que o seu grao de aceptación ou rexeitamento afectará á percepción que teñen os viaxeiros do territorio. Así, para construír un destino verdadeiramente sostible, é preciso dotar á estratexia dunha visión global que integre á poboación local para mellorar a súa calidade de vida. Esta actuación pretende achegar as bondades da actividade turística aos residentes; o obxectivo é lograr que se sintan orgullos do destino a través de actuacións que respecten a cultura, o modo de vida, a tradición... e, en definitiva, que melloren as relacións entre os viaxeiros e a cidadanía.

A tal fin promóvese a organización de eventos culturais, gastronómicos, sociais ou deportivos dirixidos á poboación local en establecementos e en espazos turísticos. Esta actuación ten un dobre obxectivo:

1. Por unha banda, achegar a labor dos profesionais do turismo á poboación local. A cidadanía poderá gozar de que actividades e de espazos que, a priori, puideran ser percibidas como orientadas aos viaxeiros.
2. Por outra, ante o posible crecemento da demanda turística en Galicia, lograr un uso



equilibrado dos espazos públicos entre os visitantes e a poboación local.

Do mesmo xeito promóvese o impulso ás actividades deportivas co obxectivo de mellorar o posicionamento de Galicia neste eido.

O turismo deportivo en Viveiro é un pilar fundamental para o concello.

Viveiro, cos seus recursos naturais e a súa paixón polo deporte, converteuse nun referente para o turismo deportivo en Galicia. Non é casualidade que cada ano atrae a miles de deportistas e afeccionados que atopan neste concello o escenario perfecto para a práctica das súas disciplinas favoritas.

A situación privilexiada, coa ría, as praias e os montes, ofrece un abano de posibilidades para actividades acuáticas, de aventura e de montaña. Pero o éxito do turismo deportivo en Viveiro non se debe unicamente á contorna. Detrás de cada evento, de cada competición, hai un compromiso firme do Concello de Viveiro co deporte.

Enténdese o deporte non só como unha actividade saudable e de ocio, senón tamén como un motor económico e un factor de promoción do concello. Por iso, desde o Concello, apóstase decididamente por apoiar e fomentar a celebración e organización de diversas probas deportivas ao longo do ano.

Dende regatas , campionatos de surf , carreiras populares, probas de ciclismo de montaña e eventos de trail running polos sendeiros, ata torneos de bádminton, ximnasia rítmica , fútbol, tiro... Viveiro vístese de deporte en cada estación. A Gala do Deporte, Deporte na Rúa, a carreira de Adrián Ben a Cerimonia de homenaxe e renomeamento do estadio municipal de Cantarrana, son outros exemplos do compromiso de concello co deporte. Estas iniciativas non só dinamizan a hostalería e o comercio local, senón que tamén proxectan a imaxe de Viveiro a nivel autonómico e nacional, atraendo a novos visitantes e consolidando a posición como destino de referencia para o turismo deportivo.

O obxectivo é seguir traballando para ofrecer as mellores condicións e infraestruturas, garantindo a calidade e a seguridade en todas as probas. Porque en Viveiro, o deporte é máis que unha paixón, é un compromiso co futuro e co benestar de todos. O concello pretende converter a vila nun destino deportivo.

A Axencia de Turismo de Galicia está interesada en colaborar neste proxecto, que supón a



posta en valor dos recursos turísticos do concello, o que tamén contribuirá á revalorización do turismo da Comunidade Autónoma e a necesidade de atender áreas con necesidades específicas para a posta en valor dos elementos patrimoniais inmateriais do concello, ofrecendo aos visitantes e peregrinos produtos turísticos que incidirán na promoción e potenciación do turismo en Galicia.

Viveiro recibe unha numerosa afluencia de visitantes ao longo de todo o ano mostrándose como un emprazamento turístico de índole nacional e internacional. O proxecto turístico de Viveiro oferta dende festas; romarías; tradicións e eventos multitudinarios ata a celebración de festivais musicais internacionais; festas gastronómicas, temáticas, parroquiais e patronais, mercados ou vías de peregrinación.

Que a través deste convenio, outórgase ó Concello de Viveiro unha subvención directa en virtude do disposto no artigo 19.4 c) da Lei 9/2007, do 13 de xuño, de subvencións de Galicia, polas razóns de interese público, social, económico e humanitario expostas nos puntos anteriores que dificulta a súa convocatoria pública, de conformidade co previsto no artigo 26.2.a) da Lei 9/2007 do 13 de xuño, de subvencións de Galicia.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados Lei 9/2017, do 8 de novembro, de contratos do sector público, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

E para que conste, asíñase esta memoria, en Santiago de Compostela

O xerente de Turismo de Galicia

Antonio Casas Calviño

